



Sessione di l'Assemblea di Corsica
U 24 d'aprile di u 2020
Discorsu di u Presidente*
Jean-Guy Talamoni

Care cunsigliere, cari cunsiglieri,

Ci ritruvemu oghje in una situazione particolare, da luntanu, per una sessione numerica. Simu forse a prima Assemblea à addunisce si di tale manera.

Prima di tuttu, vuleria chè no pensessimu à e 62 persone chì anu persu a vita in Corsica per via di u Covid-19 è à e so famiglie. Dipoi a nostra ultima sessione, avemu persu dinù trè anziani cunsiglieri di a nostra Assemblea. Vogliu parlà di Lucianu Felli, di Nicolas Alfonsi è di Paul Natali. Vi prupongu chè no li rendessimu l'umaghju publicu ch'elli si meritenu quand'è no turneremu à addunisce ci in seme.

Eppò, vuleria ringrazià i persunali di l'uspidali, di l'EHPAD, tutti i quelli chì cuntinueghjanu à travaglià malgratu e cundizione difficiule è i risichi. Casciaghje, fattori, trasportatori, agricoltori è piscadori chì permettenu di mantene a vita. Vogliu ringrazià dinù i servizii di a cullettività ch'anu permessu una cuntinuità di l'azione publica, cum'è per indettu, l'organizzazione di sta sessione.

U nostru paese, quale hè chì l'averia criduta, hè diventatu un locu periculosu per i nostri anziani. Puru s'è l'epidemia tocca tutta a pupulazione, sò quantu ella hè stata dura per e famiglia di stà luntanu da i soi.

Li vogliu dì chì per contu nostru, s'è ùn avemu micca tutti i puteri, avemu circatu à parà li da u periculu, da tantu chè l'avemu pussuta fà. Aviamu dumandatu l'interuzione di i trasporti è a chjusura di e scole, u rinvii di l'elezione municipale, a generalisazione di i testi, a sperimentazione d'un trattamentu assuciendu l'idrossiclorocchina cù l'azitromissina. U 27 di marzu scorsu, aghju presentatu un raportu sanitarium « Luttà contr'à u Covid-19 » in conferenza di i presidenti cù una lista di pruposte da mette in ballu subbitu subbitu. Cù u fondu Corsica sulidaria, è u sustegnu di più d'800 dunatori, avemu accoltu più di 100 000€ per attrazzà EHPAD è uspidali.

« Peste è guerre trovanu sempre a ghjente spruvista » scriveva Camus. Dipoi 20 anni è più, e pulitiche sanitarie anu dinù addebbulitu e strutture di salute. Cù una pupolazione anziana, un numeru impurtante di ghjente in ALD, più di 30 000, senza CHU, pochi letti di reanimazione, ci simu trovi più spruvisti chè d'altri, ma forse più solidarii dinù cù un rispettu strettu di u cunfinamentu, cù azione di solidarietà, cù creazione di mascare in i nostri paesi. Senza trumbette nè tamburi, avemu vistu i Corsi fà u so « mistieru d'omu ». Anu capitu ch'ùn si pudia aspettà, ch'ùn si pudia barattà cù sta pesta. Puru s'è cunniscimu sempre pocu u Covid-19, anu pigliatu e cose à u seriu, « cù u curagiu di i so sintimi », senza circà à accuncià si cù a malatia. À l'acconciu cecu, anu preferitu a lotta in l'associu, mettendu si insieme per luttà è per vince insieme.

Puru s'è u Presidente di a Republica hà parlatu d'un scunfinamentu per l'11 di maghju, per contu nostru, pensemu chì l'affari ùn sò daretu à noi. Cù tutti i sacrificii ch'avemu fattu, ùn pudemu micca piglià u risicu d'un scunfinamentu senza mascare è prutezzione per tutti è senza testi. A messa in ballu di misure sanitarie forte, cum'ella si vede in d'altri paesi aurupèi isulani menu tocchi chè noi, cum'è per esempiu Malta, cù solu 3 morti o l'Islanda, cù 10 morti, hè una prumessa di riescita è d'avvene novu.

Durante tutta a nostra storia, l'isulanità ci hè stata presentata cum'è una debbulezza. Ne pudemu fà una forza, avà chè no simu à scumbatte contr'à sta malatia è dopu dinù, quandu ella venerà l'ora di a ricustruzione, a nostra sfida nova, per turnà à avè a vita davanti à noi.

A ringrazià vi.

*Seul le prononcé fait foi

Contact presse : Julia Marchini– 06 03 66 94 80